



4.

## QUÆSTIO MEDICA,

*Quodlibetariis disputationibus manè discutienda in Scholis  
Medicorum, die Jovis 20 Februarii 1721.*

M. GERMANO PREAUX,

Professore Regio, Doctore Medico,  
Præside.

*An à succo nervæo, totius ferè corporis nutritio?*

### I.

QUI in macrocosmo, tantoperè viget & dominatur motus, in microcosmo sive homine non minùs potens & efficax. Totum hominis corpus in motu; hic in partibus quibusdam, ut corde, arteriis, diaphragmate, pulmonibus conspicuus: Nè credas tamen eas, in quibus non apparet ipso carere; viscera quippè suum habent licèt obscurum, sine quo suo nequeant officio fungi: quin & in homine cum somno sepultus quiescere videtur, comperias è functionibus corporeis vitales omnes, & naturales ferè singulas; è spiritalibus imaginationem & memoriam operari. Tanti igitur ad vitam momenti motus est, ut in ipso vita consistat, ac vivere nil sit aliud quàm movere & moveri, sitque ad vivendum motus calore magis necessarius. Si cessat is omninò, nec ullà arte revocari potest, mors; si ritè peragitur, sanitas; si malè & depravatè, morbus est. Hic à parentum semine in quo delitescit, in liberos tradux, fœtus in utero materno conclusi vitalibus principiis inuritur; hunc solidæ partes prinitùs suscipiunt, cor imprimis præcipuum humanæ machinæ elaterium, in quo absque ullo nervorum, aut sanguinis adminiculo primùm micat, in quo toto vitæ circulo persistit, & post interitum superstes aliquandiù remanet: à solidis partibus in liquidas influit, quæ postea solidarum motum adjuvant, indeque exoritur motionis quisdam circulus, cujus postmodò nec principium nec finis.

### II.

A Tot motibus ab humano corpore, aut in ipso exerceri solitis, duplex consequitur perniciès; prima, partium fluidarum jugis dissipatio; secunda, solidarum detrimentum: fluida jugiter dissipantur, tum quoniam naturâ suâ atque indole facillè avolant, tum quia vase malè obtru-

**A**rato, & poris atque foraminibus pervio, ut est humanum corpus, continentur: adde causarum externarum efficientiam, exercitia, labores, studia, vigilias, venerem, ætum, &c. Deteruntur partes solidæ, ipsarum elateria usu continuo laxantur, languescunt; cribra augentur, vel minuuntur, & proportionem quam cum succis debent habere, amittunt; quin & ossa etiam durissima, tandem exarescunt, minuuntur, & in detrimenti partem veniunt. Quid mirum postea si tenella satis, fragilibusque humana machina tandem pereat, fiatque nil miserantis orci victima? elegans tamen & concinna cum sit, meruit saltē, ut, quoad fieri posset conservaretur. Hoc munere fungitur nutritio, quæ aliud est nihil, quàm succi qui effluxit, per novum succum instauratio: hic debitæ crasi & consistentiæ præditus, & parti nutriendæ finitimus, ejus qui discessit, sumit locum, donec dissipatus ipse, alteri advenienti locum cedat; hinc facultates attractrix, retentrix, concoctrix & expultrix tam inutiles quàm imaginariæ cum veteribus Medicis ceciderunt; nec putes istum succum aut spiritu infuso, aut proprio partis fermento indigere ut ipsi uniatur.

### III.

**C**ORPUS humanum, licet infinitis propemodum partibus conflatum composita admodum machina videatur, revera tamen satis simplex est. Fœtum primis conceptionis diebus investiga, discute, invenias aliud esse nihil quàm nervorum fasciculum. Spiritus generationis primus author, & opifex è masculo semine prodiens, fasciculum istum juxta naturæ leges digerit, ordinat, disponit: exin è nervis extensis musculi; compactis & contractis, ligamenta, tendines; expansis, membranæ & viscerum stamina; excavatis, canales; convolutis, glandulæ formantur: in toto illo opificio, nil nisi nervos comperias. Hominem in statu post accretionem perfecto examina, partes omnes quæ non sunt fluidæ è nervis esse concinnatas evidenter apparebit; quin & ossa, quorum natura à nervis valdè discrepans videtur, mollia initio ac tenera fuisse constat, & ejusdem primitis cum nervis conditionis. Ut quid igitur in albas & rubras, sive spermaticas & carnosas partium discrimen? Cum, quæ sanguinis accessione carnosæ apparent ut cor, jecur, lien, renes, musculi, &c. Si sanguine exuantur, albæ mox & nervæ revera sint: nervis itaque totam ferè humanæ machinæ compagem constituentibus debetur ferè omnis nutritio.

### IV.

**A**T, quo nutrimenti genere copiosum nervorum systema ali conveniet? ab antiquis, corporis totius nutriendi munus sanguini fuerat impositum, ita ut carnosas & sanguineas, absque ullâ sui mutatione; spermaticas non-nisi transformatus aleret: hoc nutriendi corporis munere jamdiu sanguis excidit. Si querant veteribus addicti quemnam usum, si nutritionis officio privetur, sit habiturus; nempe ut flumini in plures canales diviso, & universam urbem alluenti similis, singulis corporis partibus com-

3

meatus suppeditet necessarios, calorem & vitalitatem ubique disseminet; moribus voluntariis inserviat, & partium fibras in se confidere non patiantur: hæc sufficiant, ut nec otiosus, nec inutilis existimetur; at ipsi corpus nutrire non est datum. Ut humus lentis ac dulcibus pluviis melius quam procellosis & tempestuosis irrigatur, sic corpus succo sanguinis & cunctantèr admoto refarcitur meliùs quàm eo qui rapido nimis cursu feratur, ut sanguis est. In ipso, cùm duplex sit pars una rubicunda, altera albicans; rubicunda si exigua est, ut recentiores asserunt, & albicante multò minor, quomodo infinitis propemodùm nervorum propaginibus, sufficiens alimentum suppeditabit: si verò copiosa, nervosne alere poterit, quin ipsos simili colore inficiat, ut bilem videmus cysti sua conclusam, intestinum colum quâ parte ipsi annectitur, flavo colore imbuerè; persistens autem toto vitæ decursu nervorum albedo, ab alio quàm sanguine succo ipsos sustentari luculentèr arguit. Ast, inquires, præsto aliquid est quod sanguinis vices supplere possit, succus ille nimirum copiosissimus, cui lymphæ nomen est, cum sanguine obambulans; qui ab ipso secretus, in gelatinam spissam, igne supposito vertitur: verùm si succi istius originem scrutari libuerit, invenies ipsum ex alimentis genitum nil aliud esse quàm chylum pluribus circuitibus subactum & attenuatum. Equidem pro remoto nervorum nutrimento chylum agnoscere non recusamus; pro proximo non item.

## V.

**N**ERVOS ex pluribus membranis conflatos esse canales, & usquè ad minusculos substantiâ quâdam albâ, spissâ glutinosâ factos, ferè nemo negaverit: mirum in probandâ ejus existentia desudasse quosdam Medicos: quis talem substantiam esse putet animalem spiritum, quem omnes unanimi consensu Medici esse tenuissimum, levissimum, & æthereæ quodammodo naturæ prædicant? nec est, quod sentiant quidam, eum, si non sit animalis spiritus, esse saltem, ejus quoquo versum deducendi, vehiculum. Hic nervorum non subit cavum ubi à succo crasso & glutinoso dubio-procul suffocaretur; in nervorum membranas, seu potius fibras nerveas è quibus concinnantur, influit, ipsisque elasticam virtutem impertit, ad omnes corporis functiones tantoperè necessariam. Quid vetat igitur credere infinitarum penè glandularum, ex quibus corticalis cerebri substantia constat, alias ab allato sibi per arterias sanguine secernere spiritum animale, qui in membranas instilletur; alias verò chylum, qui medullarem, quâcum planè convenit, substantiam, succi nervei primarium fontem refarciat? Ultimè hic usus præstabitur etiam à substantiæ cineritiæ, quæ in medullæ oblongatæ, & medullæ spinalis centro existit, glandulis, à quibus succo nerveo non mediocres ferentur suppetiæ. Sed quisnam tandem istius succi usus erit? nimirum ut nervorum fibras humectet, foveat, molles efficiat & flexibiles; &, quod vera nutritio est, in ejus qui effluxit locum, substituatur. His muneribus ritè perfunderetur, si sit legitimâ crasi & consistentiâ donatus: nam si tenuior non satis adhærebit, citiùs dissipabitur; si crassior in fibrarum poros subire non poterit, & ab utroque macies &

4

extenuatio ; si nimis aquosus , fibras inflabit , & anasarcam pariet ; si acrimoniam habeat , fibras exsiccabit , easque reddet duras & rigidas. Porro juvenum , in quibus copiosus est , corpus molle , tenerum & flore quodam vivido renidens ; senum , in quibus parcior , exuccum , squalidum , rugis asperum. Venere , laboribus , inedia , dolore , mœrore , morbis pluribus minuitur ; reparatur quiete , cibis euchymis , & somno cerebri amicissimo. Jam si patet nervos totum ferè corpus constituentes ab ipso nutriri , nonne licet concludere ,

*Ergo à succo nerveo , totius ferè corporis nutritio.*

Domini Doctores disputaturi.

<i>M. Joannes Franciscus Cou-</i> <i>tier.</i>	<i>M. Michael Procope Cou-</i> <i>teaux.</i>	<i>M. Petrus Marais.</i>
<i>M. Joannes Baptista Mon-</i> <i>gin.</i>	<i>M. Joan. Claud. Adrianus</i> <i>Helveticus , Regi à san-</i> <i>ctioribus Consiliis , &amp;</i> <i>Medicus Regis perpetuo</i> <i>ordinarius , &amp; à Regiâ</i> <i>Scientiarum Academiâ.</i>	<i>M. Joan. Baptista Dodart :</i> <i>Regi à sanctioribus Con-</i> <i>siliis , Archiatrorum Co-</i> <i>mes.</i>
<i>M. Alexander le François.</i>	<i>M. Salvator Cluscard.</i>	<i>M. Philippus Doute , anti-</i> <i>quæ Facultatis Decanus.</i>

Proponebat Parisiis THOMAS RENATUS GASNIER ,  
Parisiinus , Baccalaureus Medicus , A. R. S. H. 1721.  
à sextâ ad meridiem.